

易

通

釋

易通釋卷十九

離菰樓易學之三

江都焦循學

咸 咸臨 品物咸章 品物咸亨 萬國咸寧

循按彖傳云咸感也二氣感應以相與繫辭傳云易无思也无爲也寂然不動感而遂通天下之故感卽孚也凡卦之元亨成家人屯蹇革凡卦之利貞成旣濟咸旣濟益成旣濟咸寂然不動感於損而通成旣濟益寂然不動感於恆而通上經乾坤之下首以屯蒙下經首以咸恆明此義也凡成兩旣濟則不能感通故坤傳云咸亨姤傳云咸章乾傳云咸寧乾成家

人通於解而解成咸故云咸寧謂解成咸而乾之成
家人者始寧也坤成屯通於鼎而鼎成咸故云咸亨
謂屯三從鼎五而亨也乾四之坤初成復失道矣復
通於姤姤成咸與坤成屯通於鼎同故坤品物咸亨
姤亦品物咸章坤成復猶師成臨師成臨猶蒙成損
損孚於咸而名咸臨孚於遯卽爲咸臨臨二之五而
遯上之臨三遯成咸故咸臨也

恆 利用恆 立心勿恆 貞疾恆不死 行有恆
進退无恆 以恆也

循按咸者謂其感通於損恆者謂其嗣續於益咸通

於損損成益益又通於恆恆二之五成咸而益上乃
之三而終咸又通損故恆久而不已也不通於恆益
上遽之三而終所謂立心勿恆凶有終無始所以凶
也凡卦以旁通往來而成益者必變通於恆有如此
家人雖通解屯雖通鼎家人上之解三則成恆鼎上
之屯三則成恆成恆正是勿恆解二先之五鼎二先
之五猶恆二之五正是恆心傳於家人贊云行有恆
謂解二之五而後上之解三卽同於恆二之五而後
益上之三如是爲有恆是知恆之所以爲恆也豫六
五貞疾恆不死傳云六五貞疾乘剛也恆不死中未

亡也貞疾猶疾貞謂小畜上之豫三成需小過猶姤
上之復三成明夷大過需二之小過五明夷五之大
過二雖成咸不可爲恆需明夷成旣濟第爲疾貞而
己先己乘剛則疾貞不可惟需變通於晉而晉成咸
乃爲利用恆亦惟小過變通於中孚而小過成咸乃
爲恆不死需初九需于郊利用恆郊卽自我西郊之
郊恆不死之恆與此利用恆之恆一貫者也歸妹初
九歸妹以娣傳云以恆也以恆猶云用恆歸妹四之
漸初漸成家人歸妹成臨臨通遯而遯成咸用恆也
卽咸臨也家人通解而解成咸亦用恆也卽家人之

行有恆也。然則易以有恆爲重矣。而文言傳云。上下
无常。非爲邪也。進退无恆。非離羣也。繫辭傳云。變動
不居。周流六虛。上下无常。剛柔相易。是又以无常爲
重。何也。易窮則變。變則通。通則久。惟變通乃得恆久。
无常无恆者。變通之謂也。二進於五。爲有常。剛孚於
柔。爲无常。惟无常而後有常。无常而不有常。則失常。
需初九。利用恆。傳云。未失常也。是也。有常變而无常。
爲反常。卽爲變常。歸妹九二。傳云。未變常也。屯六二。
傳云。反常也。是也。需用恆。則二之晉五成否。是爲不
失常。鼎成泰。卽變通於否。反其類。故爲反常。歸妹成。

臨卽通遯。臨成屯是未失常。不必卽通於鼎。是未變常也。歸妹四之漸初。同於同人四之師初。歸妹三之漸上。同於比三之大有上。故歸妹漸成蹇大壯。同於成家人臨。而同人師成家人臨。卽同於大有比成大畜屯。屯通鼎而鼎成泰。爲家人通解而解成泰之比。例此十年乃字之反常。與師左次之未失常。互明也。大壯蹇相錯爲需小過。此利用恆之未失常。與歸妹以娣之以恆。互明也。利幽人之貞。指臨通遯亦指家人通解。此歸妹九二之未變常。與師六四之未失常。互明也。惟大壯蹇爲需小過之比例。而家人臨又爲

大壯蹇之比例此需于郊與同人于郊所以互明也
微妙神通非筆所能盡矣

遯

遯世无悶

遯世无悶

豚魚

循按文王作卦辭名之爲彖彖卽遯也遯謂挽而去
也乾坤交而成屯挽去從鼎鼎二之五卽名之爲遯
遯以舍此就彼爲義卽屯之從鼎鼎可例其他矣傳於
乾初九贊云不易乎世不成乎名遯世无悶此遯字
指乾上之坤三成謙何也謙易世則通履謙履相錯
爲臨遯臨之於遯猶謙之於履也乾二之坤五成同
人比爲師二之五之比例乾二不之坤五而上之坤

三成謙卽猶師二不之五而同人上之師三成升謙
通履錯爲臨遯升革則錯爲大過大過通頤與升通
无妄同卽與臨通遯同故傳於大過亦贊云遯世无
悶所以於大過贊以遯者同人上之師三成升同人
四之師初成臨升革錯爲大過家人臨錯爲中孚中
孚通小過卽是臨通遯中孚豚魚吉釋文豚黃作遯
黃謂晉黃穎也李鼎祚亦言虞氏以三至上體遯便
以豚魚爲遯魚經以中孚通小過爲臨通遯之比例
傳則以大過通頤爲中孚通小過之比例明同人上
之師三爲姤上之復三之比例同人四之師初爲履

四之謙初之比例乃知兩遯世爲中孚豚字而贊豚與遯爲假借虞氏得之鼎祚不知也

大壯 女壯 馬壯 壯于前趾 壯于頄 剝牀

巽在牀下 從或戕之

循按壯之義同於莊

檀弓柳莊古今人表作柳壯

釋名莊裝也裝其上

使高也壯之爲壯亦由幼學弱冠之年而加與裝高之義同方言秦晉之間凡人之大謂之獎或謂之壯是也傳云大壯大者壯也四陽在下以二之五加於三四兩陽之上故爲大壯所謂小人用壯也用壯則成革與夬成革同夬二之剝五爲大壯二之五之比

例乃初九壯于前趾九三壯于頄則指夬二之謙五
 夬雖成革而未通於剝故爲咎爲凶也姤二之復五
 然後復三之姤上姤成咸復成旣濟相錯爲革爲女
 壯女指咸上兌下勿用取女之女卽此女取女二字
 與咸相鈎貫傳稱咸章贊之甚明若姤二未之復五
 而復三先之姤上則姤不成咸而成大過上雖有兌
 女而不壯故傳於大過以本末弱贊之弱者不壯也
 大過則弱咸則壯咸者速也疾也爾雅釋言以疾齊
 釋壯字齊指二五疾指成咸此易師之遺訓也馬壯
 者中孚二之小過五也豐四之渙初成中孚中孚二

之小過五小過成咸三四兩陽加一陽於五而成乾
馬故云馬壯其稱壯何也豐四之渙初成中孚明夷
小畜上之豫三成需小過需小過相錯爲大壯蹇小
過通中孚卽大壯通觀故中孚二之小過五爲大壯
二之五之比例大壯觀爲小畜豫之相錯小畜二之
豫五卽大壯二之五之比例乃小畜二不之豫五而
豫四之初成復小畜二不之豫五而上之豫三成小
過皆不可爲壯彖於復通姤稱女壯爻卽於小過通
中孚稱馬壯由不壯變通而仍壯女壯馬壯所以與
大壯相發明乃不明於小畜豫而明於姤並不明於

小過中孚而明於渙明夷則經文鈎貫之奧然比例
求之井然也於是巽剝兩卦之言牀以聲音假借求
之知其取乎壯也釋名牀裝也所以自裝載也牀與
壯同聲同義震四之巽初成小畜復與豫四之初同
豫小畜旣相錯爲大壯觀則豫四之初卽大壯四之
觀初凡四之初爲下大壯四之觀初是爲壯下壯下
不辭故云牀下牀下卽壯下也夬二之剝五本同於
大壯二之五若夬二不之剝五而剝上之三卽是大
壯二不之五而觀上之三亦卽小畜二不之豫五而
上之豫三是爲剝壯剝壯亦不辭故云剝牀剝牀卽

剝壯也。剝以上之三爲義。剝壯卽是壯上壯下壯上均非大壯。此又與女壯馬壯互明者也。小過九三弗過防之從或戕之弗過則小畜上不之豫三小畜上之豫三成小過。小過需旣相錯爲蹇大壯則成小過卽是成大壯。但此卽剝壯不可爲壯故云戕之戕亦从爿聲爲壯字之假借。焦氏說梮云剝卦初六剝牀以足稽考牀乃戕之譌似有見而以爲譌則非已變則稱馬壯未變則爲戕之也。戕之訓爲傷馬融虞翻訓壯爲傷此正古戕壯相通之遺義。

晉

循按卦名必合旁通兩卦始明需之於明夷不可進

者也。需旁通於晉而後可進者也。故需不進而晉進。釋文：晉孟作齊。子西反。義同。子西則讀同躋。震六二躋于九陵。謂震成復通姤。姤二之復五也。漸上之歸妹三成大壯。蹇猶小畜上之豫三成需小過。大壯二之五爲需。二之晉五之比例。故壯之訓爲齊。雅大壯通觀。蹇通睽。合之卽需通晉小過。通中孚。大壯通觀。錯之爲小畜通豫。蹇通睽。錯之爲旅通節。而小畜通豫。爲賁通困之比例。旅通節。爲復通姤之比例。此姤二之復五。所以稱躋。躋進皆晉也。不進不躋則爲處。處與晉相反。卽與齊相反。旅九四。旅于處。得其資斧。

釋文資斧子夏傳及衆家並作齊斧齊與處緊相呼
吸需二之晉五爲晉則睽二之五爲進亦節二之旅
五爲進節二不之旅五而旅四之初非進也節二不
之旅五而旅上之節三亦非進也非進則爲處旅于
處謂旅四之初也其旅上之節三與小畜上之豫三
同小畜上九旣處謂小畜上之豫三卽謂旅上之節
三也處而成需小過則需通晉爲得其齊齊卽晉也
處而成賁則賁通困亦得其齊齊卽晉也故云得其
齊斧旅上之節三成需小過小畜上之豫三亦成需
小過旅四之初成賁豫四之初則成復復通姤而躋

于九陵卽賁通困而得其齊斧也震四之巽初震成復巽成小畜復通姤爲躋于九陵小畜二之豫五成家人萃卽困二之賁五之比例則亦得其齊斧乃小畜二不之豫五而上之復三復五不之姤二而三之小畜上成需明夷在復旣無所爲躋在小畜亦無所爲得卽爲喪其齊斧旅之得其齊斧承上旅于處連文而旅于處引申小畜之旣處得其齊斧引申巽之喪其齊斧以巽在牀下之牀爲壯之假借女壯卽躋于九陵思之思之其義躍然可見晉通於齊齊通於資資通於積說文嬭齊也嬭與嘖積同聲字通爾雅

釋魚鯖小而脰。釋文鯖本作資。說文積積禾也。詩曰積之秩秩。今詩作積之栗栗。姊咨也。通亦積也。旣夕注古文第作莢。是从弟从責之字。與資通。卽與齊通。故易稱積稱肺。皆謂需二之晉五。晉之爲積爲肺。卽齊之爲積爲肺也。

明夷 匪夷所思 遇其夷主

循按序卦傳云。進必有所傷。故受之以明夷。夷者傷也。傷則不明。凡稱幽不明。聰不明。不傷財。亦以傷者。可由是推矣。豐四之渙初。豐成明夷。渙成中孚。則失是而爲匪。匪則成明夷。故云匪夷所思。匪則傷其所。

思成明夷也。明夷變通於訟。訟二之明夷五爲明夷之主人。豐九四遇其夷主。謂豐成明夷而變通於訟也。虞仲翔說遇其夷主。謂四行成明夷是也。

家人 不家 无家 子克家 承家 邵其家

循按序卦傳云。傷於外者必反其家。故受之以家人。家上用一反字。與上九傳反身互明。周禮小司徒。上地家七人。注云。有夫有婦。然後爲家。家人旁通於解。而後有夫有婦。故稱家人。初九閑有家。閑謂解四不之初。而二之五乃爲有家。解四之初。又將成屯。家人係屯不可爲有家也。屯通於鼎鼎。四亦不可之初。何

也鼎四之初成大畜大畜二之五仍是家人故不家
食吉不家者鼎四不之初而二之之五成遯不成家
人也大畜通於萃萃四不之初而大畜二先之五猶
解四不之初而二之五故曰閑之閑與閑有家同也
家人萃相錯爲革觀卽革通蒙蒙二之五蒙九二子
克家用一家字明其爲二之五成觀而後上之三克
之爲克家也渙二之豐五豐成革渙亦成觀豐渙相
錯本爲家人解渙二之豐五卽解二之五之比例豐
上六部其家部者齊同之也豐成旣濟猶數之有減
盡也渙則成益猶數之差較也部其家猶齊其家豐

渙本錯爲家人齊同之成既濟益仍相錯爲家人也
損成益咸成既濟與節其家同乃損既成益而利有
攸往謂益通於恆而上之三也益通恆而上之三則
恆成咸益成既濟既濟咸相錯不爲家人故得臣无
家此與蒙克家互明弗損益之无咎謂蒙不成損卽
以蒙二之五爲无咎弗損而益則不成既濟若蒙先
成損因而成益成既濟欲其貞吉則必利有攸往欲
利有攸往則必得臣无家弗損則有家而克之損則
克之而无家經文互明之妙思之自得師上六大君
有命開國承家師二之五而同人四之師初師成屯

同人成家人師二之五既開國矣於是同人四之師
初成家人而屯三承之是爲承家禮運仕于公曰臣
仕于家曰僕損上九得臣則无家旅六二得童僕則
有家何也旅成賁而通困困二之賁五成家人不明
言家而以童僕二字明其爲有家此經文極隱奧而
未易明者也

睽

循按序卦傳云家道窮必乖故受之以睽睽者乖也
乖者睽二不之五而四之蹇初成損上之三成大壯
也象傳云君子以同而異同謂蹇革兩五皆剛異謂

蹇睽兩五一剛一柔由同而異則蹇舍革而通睽也
睽之義爲乖又爲異同而異則不窮異而又同則不
匪異而不同則乖矣蓋睽一名而兼兩義推之否匪
則爲閉塞而凶否亨則爲顛窒而吉亦猶此也

蹇

循按蹇之訓爲跛跛者艱於行故傳以難贊蹇其行
何以難以睽羣疑故也以初往革四固成兩旣濟而
窮而睽又失道而孤若不以爲難徑情以往欲免凶
咎也鮮矣故其往也如跛之行宜後而不宜先宜待
而不宜銳是以往蹇蹇初不可往革四一蹇也舍革

而通睽睽二之五而初往從之可不蹇矣乃睽二不
之五而上之三成大壯蹇初又不可往大壯四是再
蹇也故六二云蹇蹇

解

循按序卦傳云物不可以終難故受之以解解者緩
也緩必有所失故受之以損明解緩有兩義家人上
之屯三成兩既濟則急變而通之於解則緩若歸妹
四之漸初成臨家人此家人則有難之家人得變通
則難解是解之宜解者也若既變通而二不之五至
於負且乘而成恆成泰則緩而慢矣是解之失於解

者也。凡卦皆有當與失兩義，不獨解也。釋文以解卦音蟹，緩也。解而拇，解悖，佳買反。而君子維有解，又音蟹。蓋以音蟹爲懈，緩佳買反爲解釋。卦名專爲懈，緩爻辭雜兼兩義，不知卦名已兼之。古人義不以音分，並不必分兩讀。

正義云：解有兩音，一音古買反，一音諧買反。解謂解難之初，解謂既解之後。

乃卽解之

音蟹，可悟蟹與解爲同聲假借。說卦傳離爲蟹，蟹卽解。解二不之五而負且乘，成泰而後二乃之五，是爲懈。緩泰二之五下成離，爲解卽爲蟹。泰二不之五下無離，則天下无邦。邦卽爲蚌，傳以蚌蟹並指離，其義可見。解不緩而二先之五下無離，至成泰而二之五

下有離故爲懈緩亦惟泰通否而下有離是艱難至此而得解免離之爲蟹亦兼兩義矣晉書解系傳趙王倫以宿憾收系兄弟梁王彤救之倫怒曰我於水中見蟹且惡之借蟹爲解晉人且然

損益 天道虧盈而益謙君子以裒多益寡

循按序卦傳云緩必有所失故受之以損以失贊損損失則益得皆謂五也損何以失蒙二不之五而革四之蒙初也睽二不之五而四之蹇初也二不之五而四之初損如是臨如是復與節亦如是故損通咸爲德之修卽復之修身也爲遠害卽節之不害民也

損則虛益則盈由虛而盈爲盛之始由盈而虛爲衰之始益已盈而變通於恆則興利咸通損猶益通恆恆成咸猶損成益已盈而損之則利已虛而又損之則失損亦兼此兩義損之而利故損剛益柔同爲時也履二四之謙成益特於謙傳中標出益字明其與履旁通若不舍夬則壯于前趾何得有益

夬 夬履 藩決不羸 其君之袂不如其娣之袂良兌爲附決 震爲決躁

循按彖傳云夬決也五陽相連不得爲決其以夬名者謂變通於剝而二之剝五也夬二之剝五與大壯

二之五同。大壯九四藩決。謂二之五大壯言決。猶夬言壯也。柔乘五剛。則不能決。故欲其揚于王庭。以決而和。虞仲翔謂與剝旁通。以乾決坤。是也。三五兩爻皆言夬夬。荀慈明謂兩爻俱欲夬上。非易義也。乾兌成夬。二未決也。以變通於剝。而二決而之剝。五是以夬而能夬也。故云夬夬。下夬字。指乾上之坤三之夬。上夬字。指夬二之剝五之夬也。夬二不決。以四之剝。初成需。需二之晉五。雖亦是決。然是夬需。非夬夬矣。兩言夬夬。謂宜以夬決於剝。不可成需而決於晉也。抑或夬二不決。而剝上之三。仍成謙。夬二決於謙。五

則決而不和爲壯于前趾矣故在謙不可以夬夬宜
通履而以履二決而之謙五以履二之謙五則是夬
履不是夬夬故履九五云夬履自夬通剝宜夬此夬
自謙通履宜夬此履也說卦傳震爲決躁兌爲附決
震兌之決所以贊大壯藩決之決何也大壯上震二
之五則上成兌躁與燥同火就燥謂離火就兌金大
壯二之五其決也以火就燥而成革離者麗也麗卽
附也兌之附決卽震之決躁因決而成就燥之離亦
因附麗而見觸藩之決決躁附決皆指革也歸妹九
五其君之袂不如其娣之袂良此兩袂字亦夬也君

之袂謂泰孚否而二決於五娣之袂謂大壯孚觀而
二決於五也娣之袂卽大壯之藩決傳云帝乙歸妹
不如其娣之袂良也是知君之袂卽帝乙歸妹帝乙
歸妹謂泰二之五則君之袂卽謂泰下乾決而成旣
濟也當漸上之歸妹三歸妹成大壯漸成蹇不令大
壯四之蹇初卽通觀而藩決爲娣之袂雖不免於失
道尙爲改悔早速不致更失道成泰而乃孚否爲君
之袂故泰雖帝乙歸袂不如大壯卽藩決之爲良也
否垂衣裳故借袂爲決

姤 后不省方 后以裁成天地之道輔相天地之宜

循按彖傳序卦傳雜卦傳皆以遇贊之則其字通於

遘

薛虞記姤古文作遘

乃象傳云后以施命誥四方又以后贊姤

說文后繼體君也則兼先后之義凡象傳多稱君子

概以柔進爲剛者言也其稱先王者七

復比觀无妄噬嗑豫渙

稱

后者三

泰復

而復則先王與后並稱推之先王蓋指先

甲也后蓋指後甲也每兩卦旁通俱有先後兩筮所

謂原筮也復通姤姤二至復五而上之復三復成既

濟下離爲日故云至日成既濟退藏於密故閉闕是

時姤成咸四不之初故商旅不行此先王也其姤之

成咸則更變通於損爲繼體之君故爲后也若先成

屯家人家人後通解解二之五成萃相錯爲觀革卽
觀通大壯大壯二之五之比例觀通大壯大壯二之
五爲省方今復不成屯而成旣濟姤不成家人而成
咸咸通恆不錯爲觀革故后不省方此与先王並
稱其義甚明无妄升先成旣濟益則先王也觀大壯
先成蹇革則先王也豫小畜先成旣濟咸則先王也
比大有先成屯家人則先王也噬嗑井先成蹇革則
先王也否泰先成旣濟益爲先王益通恆則后也財
成天地之道輔相天地之宜指否之成益言故稱后
姤上施而成咸然後通損以申命故稱后泰之通全

賴乎否復之復全賴乎姤姤實兼乎后之義焉後漢書魯恭傳案易五月姤用事李賢注云本多作后古字通

萃

循按彖傳序卦傳雜卦傳皆以聚贊萃謂其成咸也乾九五傳云飛龍在天大人造也釋文造劉歆父子作聚飛龍謂成家人家人變通於解解二之五爲利見大人解二之五成萃故大人聚非貫全經未易明一字也

升

升其高陵

天險不可升也

循按師二不之五而同人上之師三成升故云升其
高陵坎傳云天險不可升也何爲天險謂離成同人
同人上乾爲天不可升卽不可上之師三成升與升
其高陵互明地險謂坎成比下坤爲地比五互艮邱
也同人上之比三成蹇下艮山也陵也上坎川也由
比之邱而爲蹇之陵是爲邱陵異乎升之高爲蹇之
陵不可升其高陵而宜其山川邱陵也其義微矣

困 困蒙 其義不困窮矣 其吉則困而反則也

循按彖傳云困剛揜也揜之義爲藏雅藏者藏伏於
二不見於賁五以致成需則困窮所以名困也旣困

窮而成需。需能變通於晉。則利以和義而不困窮。故需傳云其義不困窮矣。困未成需。先初動則成節。先三動則成大過。大過明夷相錯爲革。升與同人上之師三爲比例。同人上之師三。所謂大師克也。升孚於无妄。則相遇。故雜卦傳以困爲相遇。明困不必成需。始困。卽未成需而成大過。已困也。蓋困成需。猶師成泰。困未成需。先成大過。猶師未成泰。先成升。傳以困相遇與大師克相遇互明。又於同人九四贊云。乘其墉。義弗克也。其吉則困而反則也。乘其墉。謂同人四之師初。師成臨。同人成家人。因同人上未克師三。故

未成泰然已困矣。所以明困成節之已困也。困賁相錯爲革。蒙蒙成泰。卽困成需。蒙未成泰。先成損。則革成。旣濟損旣濟相錯。卽節賁。蒙上之三成升爲同人。上之師三之比例。故蒙六四困蒙吝。明困所以爲困。而傳則於同人贊之神妙無方。不容以淺略觀矣。

井

循按泉出於天。井鑿於人。無水可使之有水。水之在下者。可汲之。令上水之在此者。可遷之。在彼。一井而裁成輔相寓焉矣。坎二不出中。而離上入於坎三。此水之伏藏於淵者也。一旦變通於噬嗑。用汲以食。而

井養不窮。泉伏於下。以人力修而出之。井之名本於坎水。如此傳之贊井。義亦有二。雜卦傳云。井通。此謂井二通於噬嗑五。惟通故養不窮。此一義也。序卦傳云。困乎上者必反下。故受之以井。此以下字贊井字。廣雅。井深也。豐井相錯爲恆。旣濟。豐四之井初。卽恆四之初之比例。恆初六浚。恆謂四之初也。傳以始求深贊之。此深字贊浚字。卽贊井之下。故井初六井泥不食。卽以下字贊之。井泥不食。謂豐四之井初也。此又一義也。說文井部。荆。罰皐也。从井从刀。易曰。井。法也。說文引易。蓋孟氏之遺。故鄭康成亦訓爲法。見制

而用之謂之法。制而用則往來不窮。此井所以通也。噬嗑傳云。君子以明罰敕法。法字贊井字。是井得噬嗑。罰乃明法。乃敕而井養。乃不窮。蒙初六利用刑人。傳云。以正法也。又云。山下出泉。用井九五泉字。以贊蒙。故井養卽蒙養。利用刑人之刑。卽豐折獄致刑之刑。豐成革。通於蒙。而後成。旣濟爲致刑。噬嗑成革。通於蒙。而後成。旣濟爲正法。經言利用刑人。而傳贊以正法。似是以法字訓解刑字。不知法字鈎貫敕法。法字明同是革之通蒙。在豐成革。如是在噬嗑成革。亦如是。故於豐言致刑。以貫經文之用刑人。而卽自以

正法與敕法兩法字相貫明其爲噬嗑之通井卽明乎噬嗑之成革荆以言成法以指井正字贊荆字徒以法爲荆字之解淺之乎言易矣

革 執之用黃牛之革 鼎耳革 乾道乃革

循按卦之名革取更革之義乾二之坤五而上之坤三應之坤成蹇乾成革革四不可又之蹇初故宜更革以通於蒙乾九四文言傳云或躍在淵乾道乃革謂乾成革改而通蒙蒙二之五山下出泉泉卽淵故躍在淵所謂乾道乃革也蒙二之五居中爲黃下坤爲牛如是則革故云用黃牛之革蓋不更變於蒙而

以革四之蹇初則無黃牛無黃牛則非用革故傳云
輦用黃牛不可以有爲也謂不可以革四之蹇初也
遯六二執之用黃牛之革遯何以稱革玩下莫之勝
三字則承上遯尾而言遯尾則臨成泰遯成咸值此
六二未變通而泰二之五成既濟爲夬二之謙五之
比例夬所謂往不勝卽此所謂莫之勝也既濟咸相
錯爲蹇革咸四之初卽是革四之蹇初故執之而通
於損蒙二之五而後革四之蒙初卽損二之五而後
咸四之初也輦卽固也執之卽不可有爲也經於遯
稱執之傳於革稱不可有爲經於革稱輦傳於遯稱

固志執之二字。又與咸九三執其隨互明。執其隨謂咸四不之初而損二之五相錯爲隨。以執字與執其隨相鈎貫。以用黃牛之革與輦用黃牛之革相鈎貫。以莫之勝與往不勝相鈎貫。用黃牛則革矣。革則說矣。故云莫之勝說經旣以執之二字鈎貫執其隨。又於師六五稱田有禽利執言田有禽師成屯也。利執言屯通鼎鼎成咸咸四不之初也。鼎二之五成遯遯成咸卽鼎成咸故於遯稱執之用黃牛之革。於師成屯通鼎稱利執言利者義也。鼎不執言而成家人則鼎耳言兌也耳坎也。鼎成遯執四不行而上行成咸。

則有言而無耳。鼎成遯，不執四而四行，則有耳而無言。乃執言固宜，用黃牛之革，不執言而鼎耳亦宜以鼎耳革。執之用黃牛之革，遯成咸，通於損也。不執而鼎耳革，遯成家人，通於解也。解二之五成萃，萃家人相錯爲革。蓋言用革，謂由革而變通於他卦也。用卽庸謂更變但言革，謂由他卦變通而成革也。遯之用革，謂遯成咸與旣濟相錯爲革。鼎耳之革，謂鼎成家人通解，解成萃，相錯爲革，非明乎相錯而比例求之，則遯之用革，鼎耳之革將不知其何以稱革矣。

鼎

循按雜卦傳云鼎取新也鼎之義爲新以器能新物

故器名鼎

賈誼言春秋鼎盛卽春秋新盛也匡衡傳言匡廬來卽匡新來也賈捐之言石顯方鼎貴卽方新貴也應劭訓鼎爲始始亦新

也繫辭傳云見乃謂之象形乃謂之器象能變化者也形器不能變化者也形器以成旣濟言象以變通言鼎是器故序卦傳以主器器字贊鼎而彖傳不言器而言象則謂屯方變通未成旣濟以取新之義言也

震

振恆

震用伐鬼方

振民

循按舜典震驚朕師史記作振驚恆二未之五而益上之三爲振恆振卽震也恆益爲震巽之相錯恆得

上震益得下震恒二不之五而益上之三則益之震去而恒之震存云振恒明震之獨在恒也傳云振恒在上明震之獨在上也恒上有震是未用震也未用震而益上卽伐三故凶用震而後伐是爲震用伐鬼方用爲更變震用則恒不振矣史記魯世家周公作毋逸云治民震懼今尙書無逸作祗懼盤庚爾謂朕曷震動萬民以遷蔡邕石經作祗動萬民以遷是震通祗故復下震稱无祗悔祗卽震也漢書律秣志東動也說文動作也作之義爲始天道始於東故震爲動而卦屬東方

艮

循按傳以止贊艮又以節爲止明止爲節非終止故
序卦傳云物不可以終動止之又云物不可以終止
成終於此亦成始於此是爲時止行健在二五時止
在初四三上若二五止而不行初四三上行而不能
待則非時止而爲艮其限艮其止止其所也艮其限
不止其所也艮其止艮其限皆猶云艮其艮止其所
則止所當止爲時止艮兌以乾坤三索故經以三上
之行爲義當則成蹇革失則成謙夫艮其止謂成蹇
而初有待因而兌成革亦止而通於蒙惟止於此故

說於彼止由於說說由於止所以爲時止也說文限阻也與艱義同易諸所稱艱難者是也艮兌成謙夫爲艱艮兌成賁節亦艱賁通於困則艱阻可解繫辭傳云困以寡怨說文恨怨也艮很也廣雅很恨也寡怨卽寡恨寡恨卽寡艱艱阻通則不復艮其限矣

漸 所由來者漸矣

循按序卦傳云漸者進也彖傳云漸之進也女歸吉也雜卦傳云漸女歸待男行也通而測之傳以晉爲進需爲不進女歸而以進字贊之明與需晉相關蓋歸妹征凶則漸上之歸妹三歸妹成大壯漸成蹇蹇

大壯相錯爲需小過在歸妹爲歸妹以須需須也需則不進蹇通於睽猶需通於晉漸之進也謂睽二進於五傳特以待字與蹇初六宜待互明於待男知漸成蹇於進知歸妹成大壯而漸之名漸可明矣文喜傳云積善之家必有余慶積不善之家必有余殃臣弑其君子弑其父非一朝一夕之故其所由來者漸矣由辨之不早辨也易曰履霜堅冰至蓋言順也此因履霜堅冰之順而推及不早辨之不順而特用一漸字以贊漸卦之義乾上之坤三成謙謙通於履爲履霜履辨上下定民志則辨之早乾坤成謙夫不善

也不能早辨。而夬四之謙。初成明夷。需積不善矣。仍不能辨。而需二之明夷五成兩。既濟。寇至災成矣。歸妹成大壯。漸成蹇。猶乾坤成謙。夬也。此時大壯卽反歸以娣。蹇卽待男而行。不善能改。故女歸吉。也不能改而漸成。既濟。歸妹成泰。猶謙夬成明夷。需此時能改而泰通於否。則帝乙歸妹以祉。元吉。既濟通未濟。亦君子之光。與需通晉光亨同。皆可由不順改而爲順。惟泰不通否。而二之五。明夷不通訟。需不通晉。而需二之明夷五。乃成大悖而不可救。是所謂由來者漸也。女歸待男。明其成蹇大壯。若初四先行。則歸妹

成臨漸成家人蹇大壯爲需小過之錯家人臨爲中
孚明夷之錯家人通解既可解悖臨通遯亦咎不長
傳於臨贊云剛浸而長於遯贊云小利貞浸而長也
浸卽漸也漸而能長則不至於不順臨遯相錯爲履
謙謙六五利用侵伐侵卽浸漢書薛宣傳注
浸字或作侵利用侵則漸
而能長傳用兩浸字贊謙之侵用一漸字贊漸卦之
漸歸妹言跛能履以其成臨而通遯坤言履霜堅冰
至以其成謙而通履經以歸妹成臨發明履卦傳以
坤成謙發明漸卦如撫銅人之穴經絡相通尋星宿
之原伏流可溯洵神奇之至矣

歸妹 帝乙歸妹 女歸 歸而逋 與人同者物必
歸焉 天造草昧 日中見沫

循按卦以歸妹名向第謂上震爲長男下兌爲少女
男子謂女子後生爲妹雅二之五則兌在上五自二
歸卽妹之歸耳及以彖傳及泰九五觀之則不可合
泰上天下地何兄妹之有而亦云歸妹於是解者或
以爲互兌互震或以爲泰三之四卽成歸妹泰三固
不可之四此卦變之說置不必論互兌互震似矣而
於彖傳所云天地之大義人之始終究莫可通貫細
爲思之凡卦之名有就當位名者有就失道名者歸

妹失道成泰。成泰而後變通。故名歸妹。泰六五與歸妹六五同稱帝乙歸妹。此卽確證。歸妹二不之五而成泰。所以天地不交而萬物不興。歸妹成泰則漸成。既濟泰與既濟係。則二之五成兩既濟而終止。改而通於否。泰與否係。則二之五而否應之。終始之際存乎變通。故云。歸妹天地之大義也。又云。歸妹人之始終也。歸猶復也。在漸既以夫征不復。婦孕不育。明其爲泰。在歸妹卽以女承筐。无實士。刲羊无血。發明彖之征凶。无攸利。明白可見。泰既濟相錯。需明夷也。泰通否。猶明夷通訟。訟九二歸而逋。明以訟二之明夷。

五爲歸卽泰通否而二之五爲歸傳卽贊於同人云
與人同者物必歸焉同人師相錯爲明夷訟經以訟
二之明夷五之歸明泰二之五之歸傳卽以師二之
五之歸明訟二之明夷五之歸而歸妹之所以爲歸
於是乎可明矣釋名妹昧也酒誥妹邦卽詩沫之鄉
妹昧沫三字通豐九三日中見沫王肅音妹鄭康成
作昧釋文引子夏傳薛注字林皆作昧王弼周易略例闡甚則明盡未
盡則明昧明盡則斗星見明微故見昧釋文昧本亦作妹又作沫豐
渙相錯爲家人解渙二之豐五又爲大壯二之五之
比例歸妹未成泰而夫征不復則成大壯而漸成蹇
婦孕不育則成臨而漸成家人皆昧也不俟成泰而

大壯卽通觀家人卽通解則昧亦歸矣傳於屯以天
造草昧贊之隨蠱成大畜屯猶歸妹成家人臨傳於
屯通鼎云草昧所以贊臨之通遯也經於泰之稱歸
妹明歸妹之成泰於豐之稱見沫明歸妹之成大壯
傳卽以屯之稱草昧明歸妹之成臨見沫卽是歸妹
草昧卽是見沫經文自相贊與傳之贊經皆神奇之
至矣

豐

循按序卦傳云得其所歸者必大故受之以豐豐者
大也窮大者必失其居彖傳云豐大也明以動故豐

王假之尚大也王假謂渙二之豐五五本柔而化爲剛此所以爲大矣五不大而四行則成明夷明夷幽不明渙成中孚亦無震不動惟渙二先之豐五豐四後之渙初豐不成明夷則明渙成益下震則動豐以明以動得名則指豐成旣濟渙成益卽爲屯家人相錯屯盈也豐滿也雅滿亦盈也屯盈則通鼎爲居貞益盈則通恆爲居貞不變通而窮則失其居以失其居與屯之不失其居相貫而豐之爲豐於是可見矣

豐卽丰

毛詩子之丰兮傳云丰豐滿也

邦从丰聲說卦傳以離爲蚌蚌卽

邦邦卽豐渙二之豐五成革而豐四之渙初卽蒙二

之五而革四之蒙初之比例亦卽睽二之五而四之
 蹇初之比例蹇成旣濟離在下爲正邦革成旣濟離
 在四亦爲正邦豐先成革而後成旣濟互離在四與
 革通蒙成旣濟合亦與咸四之初合故中孚孚乃化
 邦指二之小過五成咸而咸四之初成旣濟也中孚
 二之小過五而小過四之初爲損二之五而咸四之
 初之比例損二之五而咸四之初成旣濟爲十朋之
 龜龜指咸四之初成離傳於離稱爲蚌爲龜蚌取於
 丰邦亦取於丰豐亦取於丰蚌邦豐一也龜指咸二
 四成離亦指夬下成離龜邦指革四成離亦指蹇下

成離亦指泰下成離其義同故相次以見義羸之爲

羸則指明夷下之離

羸下羸其瓶

與泰既濟下之離

羸其角

羸之

義爲瘠爲弱故指失道之既濟龜之言久也丰之言
盛也故指當位之既濟蟹之爲解則兼失道當位言
之解成泰通否而成既濟則當位爲天下有邦矣不
通否而成既濟則失道爲羸其角矣鼃卽敝亦卽罷
井成需爲漏需二之晉五成既濟下離爲敝漏歸妹
成泰泰通否而成既濟則永終知敝中孚成需通晉
或鼓或罷罷與敝漏之敝同鼃蟹羸蚌四字皆指成
既濟有離

羸其瓶成需明夷亦相錯爲既濟泰

與龜指成既濟有離同與龜

爲類故假借爲鼈蠃蟹蚌其實鼈卽敝也罷也蠃卽
贏也蟹卽解也蚌卽邦也豐也始測得此義亦咤其
奇未敢遽信也測之旣久則誠見其爲然確不可易
故不憚煩複言之以質諸好學深思之君子焉

旅 商旅不行

循按復象傳云先王以至日閉關商旅不行虞仲翔
云坤闔爲閉關巽爲商旅爲近利市三倍姤巽伏初
故商旅不行以商旅屬巽非易義何也旅卽旅卦也
節二之旅五節成屯旅成遯姤二之復五復亦成屯
姤亦成遯故復言旅也姤二之復五不獨同於節二

之旅五亦同於臨二之五臨二之五爲至臨姤二之復五因而上之復三卽爲至日與臨二之五遯上之臨三同亦與節二之旅五節三之旅上同商旅不行者姤四不之初也姤四不之初卽旅四不之初故旅不行商卽兌九四商兌之商兌二之艮五四不之艮初謂之商兌月令盛德在金其音商兌爲正秋二張於艮五白虎通云商者張也兌下成震爲善鳴秋而有聲則商也兌成節猶坤成復復通姤與節通旅同節二之旅五而旅四不之初卽是兌二之艮五而四不之艮初亦卽是姤二之復五而姤四不之初在兌爲商兌在旅

則爲商旅於復而云商旅不行明復通姤而姤四不行卽節通旅而旅四不行也旅不行而加一商字明其爲四不行同於兌四不行之爲商兌也

巽

上巽也

順以巽也

順以巽也

順以巽也

循按說卦序卦兩傳以巽爲入經凡稱入皆指巽乾四之坤初成家人則云惟入于林中家人上巽也離上之坎三成井則云入于坎窞井下巽也賁上之困三成大過則云入于幽谷入于其宮大過下巽也履四之謙初成中孚明夷則云入于左腹中孚上巽也訟上之三成大過則云後入于地與賁上之困三同

也需二之晉五晉四之初成益則云入于穴益上巽也姤四從二五之初成家人則云出入无疾家人上巽也訟傳云入于淵謂上之三成大過卽明夷之後入于地也傳稱巽者四大畜通萃成家人巽在上故萃六三傳云上巽也蒙二之五成觀巽在上故六五云童蒙之吉順以巽也歸妹四之漸初成家人臨家人六二傳云六二之吉順以巽也謂家人通解也漸六四傳云或得其桷順以巽也謂漸成家人通解也通解則解成萃蒙成觀與革錯亦爲家人萃傳三言順以巽皆以家人上巽而言說卦傳乾健坤順震動

巽入坎陷離麗艮止兌說彖傳於巽獨不言入直稱

爲巽

小畜健而巽蠱巽而止觀順而巽恒巽而動益動而巽升巽而順井巽乎水而水上水鼎以木巽火漸止而巽中孚說而巽

巽猶

遜也遜猶讓也大抵八卦之名各名一義而義則相通乾行健謂初筮再筮不已也坤順承謂當位失道皆變通也離麗謂初四三上附於二五而當位也坎陷謂二五爲初四三上所陷沒而失道也震柔中宜動者也巽剛中宜遜以從人也艮止有所待也兌說舍乎此以通於彼也全易之義八字盡之入與出對出主二五帥衆者也入屬初四三上視二五之動以從之者也象傳以隨贊巽巽隨震而有事猶隨隨蠱

而有事。巽之无初。卽隨之无故矣。

兌 用說桎梏 輿說輶 後說之弧 莫之勝說

循按彖傳云。兌說也。說之義爲解釋。謂成革則舍而通蒙也。蒙初六用說桎梏。卽脫去革以從蒙也。革上兌用四之蒙初。用兌卽是用說。凡卦稱說者。固以卦有兌而兼用解脫之義。小畜二之豫五。豫成萃萃上兌。故說輶說輶者。萃四不之初。下坤輿無輶也。大畜二之五。而萃四不之初。卽小畜二之豫五。而豫四不之初之比例。蓋乾四之坤初成復。則有底。小畜舍復而通豫。是脫去有底之輶。亦卽脫去復。輶卽復也。屯

之有底同於復大畜脫去屯而通萃猶小畜脫去復而通豫故均云說輒也睽成泰泰通否泰二之五爲先張之弧否上之三成咸爲後說之弧咸上兌固爲說而睽成泰卽舍蹇而通否蹇上坎亦是弧蹇成旣濟睽又成旣濟兩坎在上坎坎卽是弧弧故張其一弧而脫去一弧也遯臨相錯爲謙履遯上之臨三成咸泰咸舍泰而通損故云莫之勝說說指咸上兌亦兼脫去之義也

渙

循按序卦傳云說而後散之故受之以渙渙之爲散

與萃之爲聚互相發明。渙二之豐五成觀革。相錯爲萃。家人家人上之萃三成咸三陽相聚所以爲萃。相錯爲觀革。觀上之三成蹇則兩陽分散所以爲渙。說卦傳云風以散之。正指渙上之巽矣。渙二之豐五爲夬二之剝五之比例。傳以爛贊剝爛猶渙也。延篤云渙爛乎其溢目是也。見後漢書延篤傳注云渙爛文章貌渙通煥。論語煥乎其有文章。煥乎猶云渙爛乎。渙二之豐五則來章與革通蒙蒙二之五同。蒙雜而著物相雜爲文說文散雜肉也。渙爲散散爲雜其義亦同。

節 失家節 中節 剛柔節 不知節 節飲食

循按雜卦傳云渙離也節止也明渙所以補離之失
節所以復艮之時也兌二不之艮五而四之艮初艮
成賁兌成節不能止者也節通於旅旅四不之初而
節二之旅五仍是艮其止故名爲節節所以達旅人
節之名以旁通於旅名之也傳於家人蹇鼎頤未濟
五卦皆稱節以贊之節旅相錯卽爲蹇睽蹇九五大
蹇朋來謂升二之五升通无妄而二之五成蹇猶蹇
通睽而二之五成无妄无妄蹇相錯爲屯遯卽節二
之旅五傳以蹇无妄爲中節則節二之旅五成屯遯
爲中節可知節二之旅五與屯通鼎鼎二之五同鼎

上九傳云玉鉉在上剛柔節也鼎成遯升成蹇下皆
艮止若鼎四之初成大畜猶解四之初成臨家人九
三婦子嘻嘻謂家人上之解三成恆恆四又之初成
泰故傳云失家節也家人成既濟解成泰與益成既
濟恆成泰同未濟上九傳云飲酒濡首亦不知節也
泰既濟相錯爲需故濡首成需則失節不成需則節
矣傳於頤贊云節飲食需爲飲食之道噬嗑四之井
初成需頤爲鼎四之初之比例頤舍需通大過大過
四不之初則不成需故爲節飲食委婉曲折以相贊
明非達乎相錯旁通之指未知所謂也

中孚 孚 有孚 匪孚 罔孚 斯孚

循按雜卦傳云中孚信也序卦傳云節而信之故受之以中孚彖傳釋豚魚吉云信及豚魚也革彖傳云已日乃孚信而革也豐六二傳云有孚發若信以發志也大有六五傳亦云厥孚交如信以發志也坎彖傳贊習坎有孚云行險而不失其信皆以信贊孚說文符信也孚一曰信也孚符古字通

律書割符甲索隱云符甲卽孚甲也

訟

履渙成中孚不能與明夷通宜變而通於小過聘義云孚尹旁達信也旁達猶言旁通符節兩片相合兩卦旁通似之故名孚訟成中孚猶晉成小過需二不

之晉五而晉上之三則過矣過而能改則必旁通於

中孚小過旁通中孚亦孚也訟成中孚亦過也易六

十四卦惟大過頤小過中孚專有旁通故以小過名

過中孚名孚過而能孚仍歸無過矣彖言有孚者五

需訟言孚者二革爻言有孚者十九比初六小畜六四九五

損坎言孚者九比初六小畜六四九五言孚者九泰九三六四大

三九五家人上九解六五萃初六革九三九四言孚者九有六五睽九四

九五豐六二中孚九五未濟六五上九井上六言孚者九比初六益九坎觀訟

三卦本無過必有孚以通之乃能終於無過需損兩

卦已有過必有孚以通之乃能改而無過孚上加一

中孚明兩卦旁通以二爻五為孚二不交五而四上

先行仍不爲孚。坎二之離五則有孚。坎二不之離五。離成明夷。坎成需。則不孚。坎成需猶困成需。所謂有言不信也。需與明夷不孚。而明夷變通於訟。則孚。需變通於晉。則亦孚。需有孚於晉。則光亨。訟有孚於明夷。則窒惕中吉。舉一坎以明八卦。非孚則不可行。舉一訟以明無過之卦。必與有過之卦。孚舉一需以明有過之卦。必與無過之卦。孚以我之不足。受彼之有餘。以我之有餘。補彼之不足。惟有孚。而元亨利貞之德乃行。故易重有孚。彖又於觀損兩卦。稱有孚者。觀與大壯。孚者也。損與咸。孚者也。睽四之蹇。初成損與

睽上之三成大壯同一有過損有孚而元吉觀有孚而化舉一觀以見過在三上者之有孚也舉一損以見過在初四者之有孚也過在初四者爲損過在三上者爲大壯過在初四又在三上者爲需明夷舉需以例明夷舉損以例大壯舉觀以例咸舉訟以例晉故彖之言孚止此五卦而其義已盡需之孚於晉晉初六云晉如摧如貞吉罔孚裕无咎罔孚之罔卽君子用罔之罔謂成益也需成旣濟所以貞吉者以晉成益以罔孚也需二之晉五卽未濟二之五未濟上九有孚于飲酒无咎飲酒需二之晉五也未濟爲旣

濟所孚。未濟成否。猶晉成否。爲飲食宴樂。故有孚于
飲酒无咎。旣飲酒而初四應之成益。又宜孚於恆。恆
二之五而後益上之三。則爲西鄰禘祭之時矣。乃恆
二不之五而四之初成泰。益上之三成旣濟。是爲濡
其首。益雖有孚於恆。仍爲失。是是者時也。失變通趨
時之道也。舉一未濟而諸卦可以隅反。失是者不是
也。不是者非也。非卽匪也。解二之五成萃。萃九五萃
有位无咎。匪孚。匪謂大有四之比。初成大畜。所謂无
交害匪咎也。大畜孚於萃。卽是匪孚於萃。故云匪孚。
初六有孚。六二孚乃利用禘。皆謂此匪孚。升九二亦

云孚乃利用禴。蒙上之三成升。亦失是爲匪。升旁通於无妄。亦匪孚也。彖於損。稱有孚元吉。爻於井上六。稱有孚元吉。明坎成井。與未濟成損同。雖失是而能有孚。仍爲元吉。失是成損。又損成泰。失而又失而後孚。視損之孚。更爲艱苦。泰九三勿恤其孚。損成泰則恤泰孚於否。則勿恤。否成益。則戒益孚恆。則不戒。故云不戒以孚。益九五有孚惠心。勿問元吉。謂益孚於恆也。有孚惠我德。謂恆孚於益也。坎孚於離。成同人。比比不孚於同人。而孚於大有。惟孚於大有。大有二之五。而比初比之。則成屯。屯又有孚於鼎。故盈缶一

孚於大有再孚於鼎是爲原筮原筮者再筮也大有
六五厥孚交如威如孚卽比之有孚謂比有孚於大
有而大有二之五爲交如旣交而比初比之成家人
家人上九有孚威如謂孚於解以威如二字與大有
之威如相鈎貫睽九四遇元夫交孚睽孤則成損交
謂損二之五孚謂孚於咸卽損而有孚遇元夫故元
吉也家人孚於解所謂有孚于小人解二不之五而
四之初成臨臨不可與家人孚變而孚於遯則爲斯
孚斯卽漸漸而後孚故云斯孚臨通遯猶中孚通小
過中孚通小過猶小畜通豫故中孚九五有孚攣如

无咎。小畜九五亦有孚攣如。六四有孚血去惕出无咎。與渙互明。大壯初九壯于趾征凶有孚。征凶卽歸妹之征凶。歸妹不成隨而成大壯。失是矣。此時不可不有孚。有孚者孚於觀也。大壯二之五成革。彖之單稱孚者惟革。夬兩卦。革云己日乃孚。己日謂下成離日。四止而不行。以孚於蒙。孚於蒙則改命從蒙。故六二己日乃革之。惟孚乃革。故傳云己日乃孚。信而革也。九四有孚改命吉。九三革言三就有孚。革孚蒙。蒙成益。又孚恆。故三就也。蒙二之五爲大人虎變。虎所以變。以己日乃孚。九五未占有孚。占卽變也。未占爲

蒙已占爲觀革與蒙孚。不與觀孚。孚於未變之先。此示其例矣。艮上之兌三成夬。三先於五則號惟夬孚于剝。是爲孚號兌三之艮上成夬。則孚于剝。兌二之艮五成隨。則孚于嘉。嘉者亨也。隨孚於蠱。蠱二之五而初四會之成家人。孚于嘉也。三上會之成革。亦孚于嘉也。若蠱成蹇。隨成革。革四之蹇初。是爲隨有獲貞凶。故必有孚在道。以明有孚在道。與有孚失是互明在道。則不失是矣。余學易。悟得旁通之義。測之既久。乃知傳中旁通二字。卽經文所謂孚。惟兩卦相孚而二五交。上下乃應。交而不應。不孚故也。此易所以

以孚爲重也

大過 小過 過旬 有過則改 赦過宥罪 天地
以順動故日月不過

循按過之義亦有二其一爲過失之過賁復節小畜
明夷需皆失道有過賁孚於困復孚於姤節孚於旅
小畜孚於豫明夷孚於訟需孚於晉可以改過矣乃
賁上之困三復三之姤上訟上之三成大過節三之
旅上小畜上之豫三晉上之三成小過過而不改是
謂過矣此卦所以名過也大過二五兩剛過在二故
名大過小過二五兩柔過在五故名小過大小皆不

可過而過在柔九不可故雜卦傳云小過過也其一

爲過度之過

說文過度也

義同於至

呂氏春秋異寶篇五員過於吳高誘注過猶至也

大過通

頤而二至於頤五則爲大者過小過通中孚而五至於中孚二則爲小者過而亨彖以棟橈明大過九三言棟橈凶發明之此謂過失也上六過涉過謂二之頤五涉謂頤上涉大川此則過度之過矣小過彖以可小事明小過謂五可至中孚二也六二以過與不及並言九三九四言弗過上六言過之則皆過失之過矣傳以過贊小過以顛贊大過度而至乃顛也序卦傳云不養則不可動故受之以大過此以動贊過

有其信者必行之故受之以小過此以行贊過又云有過物者必濟則以過爲濟濟亦度也豐初九遇其配主雖旬无咎往有尙傳云雖旬无咎過旬災也地官均人豐年則公旬用三日注云旬均也讀如螢螢原隰之螢易坤爲均今書亦有作旬者謂易書亦有作坤爲旬也易釋文云旬荀爽作均鄭康成解旬爲十日十亦坤數是旬是均皆指坤無疑離上之坎三成豐猶晉上之三成小過豐四之渙初成明夷爲小過四之初之比例明夷上坤由小過而有坤故云過旬明夷上坤下離小過上六飛鳥離之指其下離而

言此傳云過旬指其上坤而言旬上加一過字明其同於小過之成明夷則爲災雖旬无咎之旬不成明夷之旬也不成明夷何以有旬渙二之豐五遇其配主則渙成觀觀下雖亦有旬而非明夷之旬則爲无咎之旬而非有過之旬也小過者小畜二不之豫五而上之豫三也豫傳贊云天地以順動故日月不過不過卽是弗過謂不成小過也旣成小過變通於中孚中孚二之小過五成益故益傳云有過則改小畜二之豫五與解二之五同解傳云君子以赦過宥罪赦過則不過謂解成萃爲豫成萃之比例解二不之

五而四之初猶渙二不之豐五而豐四之渙初赦過
二字括不過弗過過旬諸過字一以貫之若不深考
視爲泛文聖人贊易之精微何由見故

既濟 未濟 天道下濟而光明

循按雜卦傳既濟定也爾雅濟成也濟益也益以上
之三成既濟故濟之義爲益損成益爲興利之益益
成既濟則爲盈溢之益矣定卽成也又濟謂之霽霽
爲雨止之名是說是濟有止義既濟者既止也未濟者
未止也故傳云終止則亂明既濟爲終止也謙傳云
天道下濟而光明濟指既濟也下謂履四下行之謙

初也履二不之謙五而四之謙初成明夷則不光明
惟履二先之謙五而後四之謙初不成明夷而成既
濟故下濟而光明下濟者下行而成既濟也贊易之
妙思之自見

男廷琥孫

授書
授詩

校字